

# Muftija Čamdžić odbio Dodikov orden

6 Jan 2012 Izmijenjeno 18:14 CET

**Muftija banjalučki ne može primiti nikakav orden od predsjednika Republike Srpske dok njegove džematlije nemaju prava koja im pripadaju.**



Muftija Čamdžić: Muslimani Bošnjaci nisu zadovoljni poštivanjem svojih prava [rjaset.ba]

Povodom obavijesti generalnog sekretara Ureda predsjednika Republike Srpske (RS) Siniše Karana da je muftija banjalučki Edhem-ef. Čamdžić odlikovan "Ordenom časti sa zlatnim zracima", Ured muftije banjalučkog izdao je saopćenje za javnost, koje prenosi agencija MINA.

Odbijanjem odličja, muftija Čamdžić želi ukazati na činjenicu da Bošnjaci u tom bh. entitetu i dalje predstavljaju građane drugog reda, kojima su uskraćena temeljna ljudska prava, objavljeno je u petak iz Ureda banjalučkog muftije.

Predsjednik RS-a Milorad Dodik je muftiji Čamdžiću dodijelio orden povodom obilježavanja Dana RS-a.

Muftija izražava zadovoljstvo, jer je Dodik ovim pokazao da cijeni njegov rad, a posebno zalaganje za mir i pomirenje među ljudima.

Predsjednik RS-a Milorad Dodik je muftiji Čamdžiću dodijelio orden povodom obilježavanja Dana RS-a.

"Međutim, muftija Čamdžić ne može primiti nikakvo odličje od predsjednika RS-a dok njegove džematlije, muslimani Bošnjaci, u ovom bh. entitetu nemaju ona prava koja zaslužuju po svim zakonima i propisima, Božjim i ljudskim, a to su jednakopravnost u raspjodeli radnih mjesta u državnim institucijama, slobodu od straha u kući i džamiji te potrebne uslove za povratak i ostanak u svojim domovima, na svojim imanjima i svojim školama", saopćeno je iz Ureda banjalučkog Muftije.

Zbog toga Ured muftije banjalučkog očekuje od vlasti u Banjoj Luci da odbijanje ovog odličja shvate kao znak da muslimani Bošnjaci nisu zadovoljni poštivanjem njihovih ljudskih prava "te da na ovaj način žele skrenuti pažnju domaćoj i međunarodnoj javnosti da hoće da se osjećaju slobodno i sigurno u svojim kućama, na svojim imanjima, u svojim džamijama, u svojim školama i na svakom mjestu u svojoj domovini".

Izvor: Al Jazeera